

GOSPEL TANGKOU

(GOSPEL HERALD)

Issue No. 07

Volume: XL

JULY : 2026



LUTHERAN THEOLOGICAL INSTITUTE HONNA



CONFESSIONAL LUTHERAN PASTORS' CONFERENCE

Kum Thupi:

‘Thou In, Lamtha Kia Vai...’

(Neh. 2: 17-18)

EDITOR:
RT. REV. KHUP DO KHEN,
BISHOP

EDITORIAL BOARD:**Founder Editor:**

Rev. Hauzalian Manlun

Editor

Rt. Rev. Khup Do Khen Bishop

Mobile: +919612388924

E-mail: khupdokhen@gmail.com

Join Editor:

Rev Suanboi Tungdim, Director of Ministries

Mob: +918837008618

Email: suanboi@gmail.com

Managing Editor:

Rev. Dr. M. Kamneithang Zou

Mobile No: +918974609177

E-mail: pastormthangboizou@gmail.com

Contributing Editor:

1. Rev Dr. Hangminthang
Mob: +919612997858
2. Rev. Thangliankham
Mob: +919862830905
3. Rev T. Chinlunmang
Mob: +917630854610
4. Evan. Ginminlun Tawtah
(Youth Promotor)
5. Nh. Nuamboi
(Women Promotor)
6. Divisional Superintendent teng

Design & Setting:

Upa Khuplajem Guite

Circulation Manager:

Sye Langnou

Mob: +918729901029

Upa Tutzamung

Mob: +918731830436

CONTENT

1. Editorial	: 1
2. MELC Mission Sunday	: 2
3. Mission Ichih Bang E?	: 5
4. Mission Sunday	: 7
5. Ka Hepina Nang Din Ahun	: 11
6. Guolnei Jonah Leh Eite	: 13
7. Meidil Sat Leh Hasat Ding Dan Aw!	: 15
8. Pasian Innsung Dongta	: 16
9. Mihing Manphat Dan	: 21
10. Mission Column	: 22
11. Report	: 28
12. MELC Innsung Thu	: 33

Life Member : ₹ 3000/-

Patron Member : ₹ 2000/-

Kum Khat lah man:

- i) Khut ah ₹ 200/-
- ii) Dah ah ₹ 250/-

Article zousie Managing Editor leh Editor kung a pieh ding; ahilouleh, Email in melcqrts@mail.com leh WhatsApp tungtawn a zong piehthei ding ahi. A lahman Circulation Manager kung a pieh ding ahi. Tualeh Article kigel zousie Editorte ngaidan ahikim suoh sih hi

Editorial laikung pan



PITEEh-PUTEEhte KHUT A UM VANGPHATNA

Tu ha sunga Pate Ni chia iminvaw uh hing umkha ahiziehin, Nu-le-pa, Pi -leh- pute khut sunga um vangletna chithu saulouin suut vai.

I Laiiangthou sungah, Pate in atate uh Thupha apieh chiengun, “Mangpa aw, ka tapa/tanu thupha hing piehsah in” chilou uhi. “Mangpan thupha hing pe taken” chizaw uhi. Tua ahiziehin, asiehiin, apha hitaleh, Pate in tate tunga tungdinga agen bang bang uh hing tangtung tahpi mawh hi.

Noah in atapa Ham leh asuan-ahahte a samsiet lai in, “Mangpa aw, Kanaan thupha hing pieh sah sinlen, a sanggamte sila hisah in,” achi sih hi. “Kanaan in samsietna ngata henlen, a sanggamte sila hita hen”, achi zaw hi. Tuama bangin, “Mangpa Pasian in Shem thupha pie hen len, Kanaan ama sila hisah taken,” achi zaw hi. Tami khu Paten ama uh khuta um vangletna azahdan uh ahi hi (Siemchil 9:18-27).

Tua ahiziehin, Piteeh-Puteeh te pen, amanpha mama, idei-ingai teng hat theina Dahpa khuong sanga jong manpha zaw ahi uhi. Tambang thu pen Jacob leh Esauin ana thei uh ahiziehin, a mitmang (blurred) ta apa uh kemnuam-khoinuam in ahing kitu ua, kiasietlaw tazen uhi.

Tua ahimanin, ineisa tawh kituoh in inu-ipa, ipi-ipute khu, ama uh dudan bang banga ann ihuansah ding uh ahi hi. Issac in, atapa tahpen Esau kungah, “Thupha ka hing pieh theina dingin, kei

“Suhdamtu hi ding ten suhdam a um angai hi” - Dennis Roger.

dudan bangin, ann tuitah hing huonsah inlen, ka neh dingin hing toiin” achi hi. (Siemchil 27:4)

Tambanga, Esau khu apa Thupha nga dinga umsa hinanleh ahing kilebul a, anaupa Jacobin ahing ngazawta moh hi. Tami khu bangma dang zieh ahisih a, azi (Esau zi) agitlou seng seng zieh ahibou hi. (Siemchil 27:46; 28:8). Na zii gitlou zieha, Napu Thupha, Napa Thupha tanglou ding nahileh, lampidang sui ahoizaw diei ichi ut phiel hi. Tambang ahiziehin, na nu le pa, ahing upat ua, ahing teeh chiengun, ama uh dudan, agilkiel hun ding uh, theipi a, ann bawlsah ding ahi hi. Tuaban ah, ama uh le ama uh kikem zounonlou ahichiengun, kidahhuai chiloua, tuilum-tuisa toh pumsil di, azuun-a eeh uh isiehsah ding uh ahi hi. Tambanga bawlte khu, akhang-akhanga Thupha nga innkuante ahing hiding uhi. ●

MELC MISSION SUNDAY

MELC MISSION SUNDAY HING PIEN KHIETDAN TOMKIM

By Retd. Rev Thangliankham, Chairman, Mission Department, MELC

Mangpa Jesu'n, “*Pei unlen Khantanhoi tangkou unlen, agingtate Pa, Tapa leh Hagau Siengthou min in Baptist unlen, thu ka hingpieh zousie hil un*” (Mt. 28: 19) na a ahing thupieh bangin Jesu'n Khantanhoi za nailou leh gingtalu Hagau mangthaite lah ah khantanhoi gen a Missionary nna sem dingin Chairel mun a Mission Field Headquarter dingin apeisa Date 1-7-1991 ni in MELC Director of Ministry (L) Rev P. K. Khama in honkhietna a nei hi. Tuani apatin Khantanhoi genna leh Mission field nasepna alawchin a ahat semna ding ngaisutin skul hon toh thuo in Pasian nasepna Chairel mun ah inei uhi. Tuachin kum phabep isep zaw un gingu ahing ki belep zel a Inn 20/30 lam bang a hing pha tah

“Ahoilouna siemphatna chang theiloite khu mi piengsuol ahi” - *Maguire Bernerdo.*

chiengun leitung khosahna maban ding khuolna in a khente Kakching banga apem ua, akhente Bamond leikai Imphal banga pem in Chairel anuasie zel uhi. Amauten a va pemna munte uah Khristian ahina uh nuasie tuom lou in atudet zing uhi.

Tuabanga Pasion nasepna inei zing laiun Chairel Faith Academy (CFA) apat lai lam a ana khanglien khanglaite akhen BA, B. Sc zou bang aum ua, tuate khu CFA teacher in isem sah zel uhi.

Tuabang a kum phabep ahing hinua in Date 1-7-2016 ni in Chairel Mission Field iphu khietna uh Kum 25 chinna “Silver Jubilee lawm in Suong iphut ua, Rt. Rev. Dr Hangminthang, Bishop MELC in Suong honna leh latna anei hi”, tuami kum in Pawlpi in Chairel Mission Field ichi uh Manipur Mission Field chi in a field min iheng uhi.

Tuabanga Pasion mapuina toh Chairel pansan a Missionary isep laiun asevel a gingtu kibelap zelin mun tuomtuom ah Fellowship type in kikhawpna nei thei ahing um a, Fellowship inei theina munte khu Pangan Tabi, Leingoubi, Chingkha, Sugnu Meitei Veng,

Serou, Kakching lamkai munte ahia, Tenthia munpen Church khat inei uhi.

Pasion mapuina toh matal touzel a Pasion gam nna sepna inei zing lai un N. Beren Sing, Chief Miniter (CM) na nuoi ah, Date 3-5-2023 in Singtang mite Meitei ten nasahtah a thangsietna jalin gal ahing bawl khum ua, I biehinnei nei sun uh Chairel a Pacca Building leh Tenthia a Cacha buildingte leh mun tuomtuom a Fellowship ineina inn te uh ahing haltum sah ua, amaute toh ki chimatna leh kizopna um thei nawntalouin 2023 December apat Manipur Mission Field Mission nasepna kholsan in aum ta a, dahuoi mama hi. I hattuum mite Pasion in akepbritna dingin I thumpi zing ding uhi.

MANIPUR POLAM MISSION FIELD:

1. Tualeh Pasion in hing mapui tou zelin FLOM te toh

“Pasion a i kingah ngamlou na zieh khu, Ama zieh I nga peilou man ahizaw hi” - *James Gordon*.

partner a Missionary isep khomna dingin UP State sunga Varanasi mun ahing pieh a 2021 vel apatin Varanasi mun ah isem tou zel uhi. Tuamun ah Kum thum (3 years) vel isep zou nua un vangsiet hoi tahn Pasion a dinga ginum gingu det mama Mrs Bindu Devi in date 3/5/2024 ni in Hindusm biehna hatna state ahina toh Jesu min a Martyr a tha a um in ahing liemsan tahi. *“Mangpa India gam a dinga na silguon bang ahiei”* chilou ngal gen ding bei bangin a um hi. Dahuoi mama khat ahi. thum zing vai.

2. MELC phasah dungjuuin Tripura state sunga Pasion hatna suongin Mission nasep lunggulna akinei a, a field mun ding sui dingin Mr Thangpau I doptah chiengin aman Kanchandpur ahing kawhmu a, tuachin Kanchandpur pan san a nasem dingin Tv. Manglianlam khu Rt. Rev Dr S. K. Manlun, Bishop MELC leh Mission Chairman Upa Chinzahau ten date 5/6/2018 ni in ava koi uhi. Kum 2018 sung Kanchandpur a Tv Manglianlam in ahing sem a, Mission Field mun

dia lemwaw leh hoizaw chiin 2019 January ha in Kangrai mun ah isuontou ua, tuana skul ipan ngal uhi. Tuana skul min dingin *“Immanuel English Medim Public School”* a minvaw in Nu Kimhoiching w/o Luna Damchera a um toh skul ipan uhi. Tualeh Tripura State a Mission nasepna hatsem ding deina in Missionary Manglianlam puile ding leh panpitu dingin Mr Luna h/o Kimhoiching khu pawlpi in Ha tengin Dangka 3000/- (tul thum) akipie hi.

Tuni tannin Tripura State Kangrai pansan a Pasion gam nna isepna uh Pasion thahatna toh matal tou zelin Dangapara mun leh Colonypara munte ah NMSI te kithuopina jalin Biehin idin theita uhi. Pasion min phatin um taken. Tu-le-tudinmun in Tripura state Mission field a Missionary-7, Tv. Manglianlam, Pitha Ram, Tv Haugoulal, Jangkholen, Sanjit Kumar Reang, Parasan Reang leh Marting Reang Lamka ah Pa Mangchinlam te ahi uhi. ahi uhi, tualeh skul a sem sangsye (teacher) mi 9

“Khovel toh kikken theilou mi khu khovel mi ahi” - Allister McGrath.

inei uhi. Amaute ahi uleh:

- i) P. Dongminthang,
Headmaster
- ii) Tv. Nangshok Rai Reang
- iii) Tv. Kaikhogin
- iv) Tv. Thanggoulen
- v) Mrs Laxmita Reang
- vi) Nh. Rongsmai Reang
- i) Nh. Jubilee Reang leh
- ii) Tv. Lamén Joy Reangte ahi
uhi.

Tualeh MELC pawlpi sunga kiguol tah a ijah khawm theina ding un *1st Sunday of July* khu **Mission Sunday** chia phuonkhiet ahia, MELC

Calender ah zong kum teng in akituongsah den tahi. Tami khu MELC in Mission Field masapen Chairel Mission field dia phuonkhietna ni ahiman in, Tualeh tami Ni (Mission Sunday) a toikhawm kimu teng khu MELC Mission Fund dinga bulpi a aki submit zel hi.

Tualeh tam banga Missionary nasem thei a hingpui I Pasion min phat kawm in Missionary nasep ihat semna dungun I thum zing ding uhi.

Mangpa Pasion in thupina tang taken. ●

MISSION ICHI BANG E?

Rev Dr M. Thangboi Zou

Thumapui: Tu Ha (July) pen MELC Calendar ah “Mission Sunday” chi a tuong a, tua toh kiton in “Mission toh kisai” laibu tuomtuom apat kaikhawm in anuoi ah mawltah in sutkhawm vai, chin ka hing kisa hi.

Mission kichi thumal khu **Latin** haam in “*Mitto or Mittere*” apat hing kilakhie ahia, **Grik** haam in “*Apostello*” toh kibang ahi. A khietna ahileh “*Sawl*” (sent) china ahi. Mission ki china in, “*Pasion in atatkhietsa mite*

zanga Khrist vanga mihingte toh kikal a Lemna bawl dia nasep khu ahi” akichi hi. **John Stoot** in, “*Mission kichi khu Vannuoi a sawl (sent) a umte toh peikhawm a hattuum in abawl zousie khu ahi*” achi hi. Taleh

“Pasion hun guot na taisan tampou leh buoina tua tam ding na hi” - *Henry Patricia*.

Emil Brunner in, “Mission nasep na zal a hattuum hing thei ahidan” agen hi.

Khristian Mission: Khristian Mission ichi khu, “*Leitung pumpi a pei a sil siem chinteng kunga khantanhui tangkou ding*” (Mt. 28: 19, Mk. 16: 15, Lk. 24: 47) chi ahi. **Gendan tuom** khat ah, “*Pasian lungtup Jesu Khrist a kiphuong doh mihingten pan ala theina ahi*” achi hi. Tualeh **Sawltah Paul** in, “*Nang na genlou leh abang chi ja ding uai, a ja lou uleh bang chin agingta ding uai?*” chin (Rom 10: 14) ah ana gen hi.

Jesu Mission: Mangpa Jesu mission ahileh, “*Van a Pa (Pasian) deilam akibawl bang a, leitung a Pa deilam akibawl ding*” (Mt. 6: 10) chi khu ahi. Tualeh, “*Jesu Khrist khu lemna bawlpa leh hundampa ahina thu igiintatna uh theipitu a panna ahia, tualeh Pasian leh mihingte kichimatna kitansa zop kiana leh kiledohsah kiana khu ahi*” (Mt. 1: 21, 20: 28, Lu. 2: 11, 21: 28, Jn. 3: 17, 4: 42, Lk. 4: 45-50, Mk. 2: 9). Ama mission khu, Jesu Khrist a bukimna mihing

ten aphuondoh na khu ahi.

Pasian mizatten Mission agendan uh: Margull in, “*Mission kichi khu gam dang a hattuum um nailou, Jesu Khrist min zong kigen kha nailou mite lah a khantanhui genza/ tangkou khu ahi*” achi hi. Tualeh **Dr Saphyal** in, “*Mission kichi khu midang hinkhuo a mopuona khat nei ihi*” chin agen hi. **M.M. Thomas** in, “*Mission kichi khu mihingte tahsalam hamsatna tuomtuom akipat a hinkhuo uh akiledoh nadia nasep khu ahi*” achi hi. **Hoedemaker** in mission toh kisai angaidan agenna ah, “*Mission kichi khu Pasian a Mithum (Trinity) te nasep ahia, Hattuum in tam nasepna ah pan theina, hamphatna inei uhi. Mission ichi khu Pasian lungtang akipat hing kipankhie ahia, Pasian khu itna vang a sawldohna nasep bulpi khu ahi*” chin agen hi. Tualeh **David Bosch** in, “*Tukhang a Mission khu hattuum mission hilou, Pasian nna ahi*” achi hi. World Missionary Conference Edinburgh (1910) in, “*Missionary nasep tup-le-ngim*

“Pasian aw (voice) leh mihing aw theikhenlou nak hu manthaina ahi” - Fred Marcus.

khu sakhuo (biehna) dangte kunga khantanhoi genpi ding ahi" chin akithukim uhi.

Mission neipa Pasion hinanleh Ama thakhel a tam Mission nasem dia gingtute khu Pasion in ngansiena/ mopuona hing pieh ahidan theichiet ding ahi. Hattuom mission khu Pasion leenggam masawnsah ding leh suhhat ding khu tunia eite mopuohna ahi hi.

Akhupsitna: Mission toh kisai thubul, a tup-le-ngim, Khristian mission, Jesu Khrist mission leh Pasion mizatte gendan isimta ua, ahileh tam Article simtuten "Mission" bangchin na koi sawm uoi?

Awleh mission ngaisah lou a anasep lam pibawl sawm hizawn amah? "Singphung a zung adetlouleh huipi, guopi hing zuh a, huipi hing lan chia aki phungkal bangin, Mission tup-le-ngim theilou anasep ipibawl zaw chiengun khantouna Sangin kiet ngiemna tunzaw ahi", tuazieh in mission tup-le-ngim thei chien masa vai in, tuazaw chiengin mission nasep lam ah pan lachiet lei, khantouna leh pichinna hing tun ding hi. Pasion in MELC te Mission tup-le-ngim thei a mission nasepna lam a pan latha chiet din, simtu zousie hing guolzawl chiet taken, chi ka thumna ahi hi. ●

MISSION SUNDAY

Pastor Douchinlal, *Local Pastor ELCB*

Thumapui: Amasa penin i Gospel Tangkou deithotah mai uh simtute zousie na unpi un i Mangpa Jesu Khrist min in ka hing nousiet hi. Tualeh "Mission Sunday" toh kisai a tam i Tangkou tungtawn a houlim theina dinga hun hoi leh hun manpha hing pie Mangpa Jesu Khrist in ilah uah thupina leh patawina zousie hing tang taken.

Mission Sunday, kum khat pen uh tup leh ngim thupipen a thawkiani khat vei izatzel keima ngaidan in Hattuom

"Leitung akipat Van ah gou na khawllut thei pen khu na innsung mite ahi" - *Larry Christenson*.

mite zousie Missionary nasepna lam a pan hatsem sem a ilah theina ding uleh, mimal hinkhuo a Pasian kunga, Ama nasem dinga atha a iki-aap tha kia zelzel na ding uh deina a izat zel uh hi dingin ka ging tahi. Tuaban ah, tami nia thawlawmte leh thumnate Missionaryte a ding leh Mission field a dingin i uang bawl deu ni uh zong ahi. Tam banga Mission Sunday izatzel laiin alawching thei semsem na dingin ngaidan nei zong tampi ium kha ding uhi. Tahsa leh Hagau lam a khanlam not a izat uh anai mah? ahilou leh kiamlam not a izat uh amah? chite zong ngaitua zel poimaw mama hi. Tuazieh in keiman alawhchin thei semna ding deinain tamlou tam Tangkou tung tawn in hing kum vang.

Khatna ah: Mission Sunday alawching semsem theina dingin eima Hagau hinkhuo chiet kivel tha va ui. 2 Kor. 13: 5, Paul in tam laisiengthou bung leh tang ah ana genbang in, ginna ah I um chietna uh amah eima leh eima ki enchien tha kia va ui.

Mission Sunday nia kikhom a, thawlawm tampipi va pia mai khu Mangpa kipahna ana hikimlou thei hi, silpieh zousie Mangpa kipah dingin zong mo ngaituah sih va ui, Mangpa pen ipieh sum leh pai sangin ,apetute nisim hinkhuo mangdan leh i piaikhawm uh sum leh paite kipatna leh imudante uah lunglut mama a jong, hing enchien mama ahi. Mangpa Pasian toh eima kilem loupi a zong hattuum a pan napia lathei veve ahi. Tu Kum thupi zong gel doh vaui in eima leh eima kivel tha chiet va ui, Van a kibawl bang a tam leitung a bawl ding a gingtu min puo ihiman un.

Nina ah: Mission Sunday a lawchin semsem na dingin eima mimal dangtanate entha kia va ui. 1Pet. 2: 2, tam laisiengthou bung leh tang in agen ma bangin naungeh suothate bangin hundamna lam a i khantou theina ding un Hagau noitui sieng ilunggul na uh amah? Tunia nang ma hinkhuo a na lunggul thupipen bang ahiei? na lunggul thupipen khu nang hing mapuitu hi ngei

“Min Pasian dihna leh sientheouna amuchien Chieng leh ama dihlouna aphuoldap thei sih hi” - *Jim Patrickson*.

ding ahi. Tuni in igam uh sa leh gaal lah a um ihi uah Paul in, Rom 13: 11 na lam ah ana gen mabangin, koima hing hillou in zong iumdan uleh idinmun uh ithei chiet uh ahi. Hundamna ni lah igen chiilai Sangin hung nai zawdeu ta ahi man in, i nisim hinkhuo uah i imutna munte uah pat thou kia a, Mangpa mai a iki tulut thakia ding uh khu akul leh apoimo mama ah. I lunggul ding pentah uh lunggul khalou a gingu minpuo maimai ihi kha ding bailam mama ana hi ahi. Gingu tampi jong tuabang hinkhuo in zanga nguitah leh basamtah a ahagau hinkhuo zang uhi.

Pasian in lunggul dinga ang dei pentah khu ,Ama thutah tuabang lunggul na eima a hung gaa khie ding khu Mission nasepna lungtang nei a kiphah tah a tha leh zung , sum leh pai, nei-le-lam itlou a septhei nakhu ahi. Tuazieh in angaituoh thei ding leh asem thei ding dinmun a um nang ma leh nang ma naki thei leh Pasian in hun hungpie nalai ahi chi manghillou in

tuma main na hagau hinkhuo siamtha kia dingin thumna toh kipan in na vai gei kha ding hi.

Thumna ah: Mission Sunday lawching thei semsem na dingin Mission nasep khu Pasian thuman na ahi chi atha in phoh tha kia vai. Mak 16: 15. Tamnah Mangpa Jesu'n leitung pumpi ah pei unlen silsiem chinteng kungah Khantanhoi gen un, tami mun a Mangpa'n nuazuite kunga, athupieh khu nang leh kei kunga zong a hingpie ahi a, gingu min paw zousie in tammi suhbuchin na ding a mawpuohna lientah kinei chiet ahi.

“Tami pen ut hunchia sep a, utlou hun chieng a seplou ding ahi sih a, sem suoh teitei ding a thupieh ahi” chia Hudson Tailor in ana gen ma bangin Mission Sunday izat uh toh kitonin, Mission nasepna lam a tukum sungin kei leh ka innkuon ten bangchin pan kala uoi ,tuni tan in bangchin ka sem uai chite eima mimal ah kingaituo chiet va ui. thaw

“Thutah khu kiheng ngailou, tangtawn a um den/ puhdet ahi” - *Garison Hyder.*

tam nakisa amah?ahisihleh
thaw tom naki sa ei?nei leh
lam sum leh pai na thaw
zoulou ta inzong mizousie i
panthei na ding uh athupi pen
thumna in imissionaryte uhleh
missionfieldte uh alawhchin
sem nading uhle adamna ding
un phoh zing va ui.

Lina ah: Mission Sunday
lawchin semsemna dingin
Mission nasep khu Mangpa
hing hepina,athuh kiana nasep
ahi chi phoh tha kia vai.

“Eiten ama thupieh izui zieh
uah aman ahing it ahi sih a,
hinanleh aman ahing it na zaal
a ama thupieh izui thei uh ahi
zaw hi. Tami ahi a hepina mi
kingaingiemte kunga theisah
a um leh mi kiliensahte apan
kiseel”, *St. Augustine*.

John 3: 16. Tam bung leh tang
in, “Mangpan leitung mite
a it seng seng a a Tapa tang
khat nei sun ahing pie, koipou
Ama gingta mangthai lou a
kumtawn hinna anei zawhna
dingin”. Tam bang itna thupha
athei a gingta ei gingtuten a
itna ile thuh theina thupi pen

khu a za nailoute leh a gingta
nailoute kunga Mangpa hoina
leh hepina tangkoupi ding khu,
I mawhpuo na lienpen uh ahi.
Mangpan a siemsa mihingte
hagau khat zong amangthang
ding phallou hi. 1Tim. 2: 4,
Aman mi zousie hundam a
um ding leh thutah thei dingin
adei hi. Tam laisiengthou a
imu bangin midangte kunga
hundamna thupha gen khu i
Mangpa kipah na leh adeilam
ahi chi atha in thei vai. Tamte
zousie zong eima hoina leh
chitna vang hilou in ama
hepina vang ahi, chia atung
a st. Augustine thu gen italat
bang un. Tuazieh in nang leh
kei mi hampaha ihidan thei in
tangthupha phuonza na lam
nasep leh bawl ah napitah in
pan latha kia vai. Ning kum a
sanga kalsuon tamzaw ding,
pe tamzaw dingin, tua hileh
mission Sunday piching sem
van Missionary nasep na zong
lawching semsem ding hi.

Akhupsitna: Mission Sunday
maban a lawchin sem sem
ding deina a ihoulimna un
atup leh a ngimthupipen
ahileh milip in Pasian ngaisah

“Mangpa khu bangkim a ka bitna ahi” - *Grayson Lucas*.

henlen, i mimal hinkhuo chiet uah amasapen in koi thei chiet lei khangtou ding leh lawching sem ding china ahi, aziehpén tulai gingu atam jote I Pasan, i ginpa uh deilam ngaituoh na ding hun neilou khop in leitung sil te a i hunte uh izang beizel vuah, ni poimo zousia thupi tah a zat ding kikhop hun chienga kikhop

le gingu hoi mama kisah kha kitam mama hi, gingu tuten i theizing ding uhleh imanghil ngailou ding uh ahileh, iMangpa pen Biahinn sunga ihinkhuo sangin Biahinn polam hinkhuo ah na lunglut mama ana hizo hi chi thei chiet vai. Mangpan simtute zousie guol hung zawl pie taken, kipah ing. ●

KA HEPINA NANG DIN AHUN

N. Ngulzachin

Sawltah Paul in natna apan dam lunggul a, Pasion kungah a thum lai in, “Ka hepina nang adin ahun” (2Kor. 12: 9) chi in adawng hi. A thumna dawn in um sih lezong, hun peisate a Pasion hepina/ zangaina amu zousie leh Khrist hingpeikia chienga Hutdamna amu dingte geldoh zaw in Khantanhoi nasepna ah Paul kipumpieh semsem hi (Mk. 16: 15, Mt. 28: 18-19). Gingloute lah, Juda kulmute lah, unau gingloute lah leh hinkhuo hamsa teng atua vang in, Paul in Pasion hepina sangsiem mama, Pasion hepina nuoi a mihingte khosa hilel lel ihidante sawlta Paul in ana chienta.

1. Pasion hepina thupi tungtuan Khristian in mu tuonlou: Leitung hinkhuo hun tomzaw leh tamzawte ah kipahna leh lawchinnate um zezeu zel nanleh, hun atamzaw thamte mi tangpi a

di’n buoina leh damlouna ahi (Thugenpa 3: 1-20). Khristian in buoina leh damlounate atua hun in (Jak. 5: 13-19), panpitu nai gige Pasion hing i nei. Buoina leh damlounate itua tawmdeuna di’n hing siemtu

“Amun leh ahun a sil kihen dan theisiem apoimaw hi” - *Peter Crouch*.

dei bangin, tep leh muom, neh leh dawn ah pilvan angai (Rom 14: 17, 22). Damthei di'n leh lungkim di'n nasep akiphamoh (Thugenpa 3: 13, II Thess. 3: 8, 10). Buoina leh tahsa damlouna khenkhat, tep leh muom ahiei neh leh taah pilvanlounate zieh leh kideh zoulou zieh bang ahi thei. Thuhun Tha hun tulai in Laisiengthou a bukimtah zieh in, Pasian insillamding bawl mangsah hieihiei tahi (I Kor. 13: 9-10). Tuami ziehtahin, tu Khristian hun in buoina leh damlouna tua in um taleh, lamdingtah a damna mu hituonlou hi. Natna leh shina khovel a um ihi ua, tuate Pasian hing gotna hilou hi. Pasian jal in nisa leh guozu nuoi ah mihingte ikhosa hi (Mt. 5: 45). Niteng- hunteng in buoina ahiei damlouna midangte bangin Khristian in atuakhah thei; kipahna leh nopsahna zong. Neh leh dawn a pilvanna ding guo hilou (Dan. 1: 8-20). Pasian hing siem dan tah a nasep (Thugenpa 5: 12, 18-19), ginum tah a bawl ikisah lai in zong Khristian in asie-apha

tuah alai hi (Job 2: 10).

2. Pasian hepina Paulin sangsiem mama: Gamaliel kengbul a khanglien (Nasep. 22: 3) siemna, theina leh pilna hau Sawltah Paul, "buoina leh hamsatnate'n umkim vel nanleh" (II Kor. 6: 3-10), Pasian hepina sangsiem mama hi. Tahsa damna, laisiemna leh a huoh (brain) pilnate Pasian dei bangin Khantanhoi nasepna in Paul in azang. A umna leh a zinna teng ahphatuomngai tah in thutah a tangkoupi a, athahat sung, a lungsim hatlai leh a mit hatlai in Pasian Huhakhum Laisiengthou a tuong laibu manpha mama 13 tah ana giel hi, tuate ahileh, Rom, 1 & 2 Korinth, Galatia, Ephesa, Philippi, Kolosa, 1 & 2 Thessolonika, 1 & 2 Timothi, Tita leh Philemon ahi. Hebrai laibu ahileh chienglou ahi. Tam Sawltah Paul khutsuo laibute leh Laisiengthou agel thutah khu leitung a haam tuomtuom akiletkhie in, leitung pumpi velsuo hi (Rom 16: 26). Pasian huhakhum vannuoi a Hutdamna lampi hing komutu thei umsun,

"Hinna lampi itheita ua, nasep toh Mangpa lemguo zui khu damna ahi" - A. Cooper.

nitawpni Chieng a vaihawmna laibu diing hi nalai (Kil. 22: 18-19). Bible mani haam a inei Pasian hepina zieh ahi.

Pasian hepina nuoi ah, hun peisate leh tuhun in a siemsa ei mihing te'n, ahing khotuana-guolzawlna banglam teng ah imu (II Kor. 9: 15). Mihing ngaituana khel lampeh ah I hoina dingin bangkim hing sepsah chiet (Rom 2: 8), Chidamna, tha-mit hatnate,

laisim leh gel siemna, sil-le-ten, neh leh dawn ineite, Pasian hepina zieh ahisua a, tuate ah ivul mai diei (Pau. 30: 7-9). Paul in Pasian hepina in asim a, tulai Khristiante'n Pasian hepina bangchi'n ipom uoi?

Source: N. Ngulzachin. "Ka zahngaiona nang di'n a hun". Edited by Miss Dimzangai, Ruth Messenger, Vol- X, July- August 2005, pp.27-28 apat ka hing lekhieth sawn ah by Managing Editor. ●

GUOLNEI JONAH LEH EITE

Dr. RT. Kendall

Bible ah Jonah tanchin i mutam seng sih. Jesu'n ataha mihing (Jonah) aum thu zong Ngapi in aval thu ana suhkip hi. Bible leh Mangpa Jesu gingtaloute'n a theichet lou zieh un a gingta sih uhi. Tunia ka gen ut pen ahileh, tulai Khristian mimal, nasemtute leh hattuomte adi'n Jonah hinkhuo in zilsah leh thucha poimaw mama nei ahidan leh Pasian hepina a thupidan chiengtah a mu ahidan tamlou talang vai.

Pasian hatna umzieh a talang: Pasian in siltup lien leh za anei a, mimal, hattuom leh leitung a dia a siltup lawching sah dingin mite makai in apui jel a, Jonah a hatna apat in Pasian in mi fel deu leh mi hoi deute lam ngadeu sang

in, mikhiel, mi hatlou, buoina bawlte bang a hutdamna mu ding leh a nasem dingin hing han (call) zaw abang hi. Tualeh, Pasian hatna himhim hi a siltup lawchinna ding leh lien zaw sem a midangte adia hamphatna di, midangte hoina

"Mani innkuon chiet suhtup ding khu nu leh pa mawpuohna ahi"
- Andy Stanley.

ding, gam leh nam pumpi huop in a itna leh hepina talatna ding ahi gige hi.

Mihingte'n i na pomdan/sandan a talang: Sil lamdang mama khat ahileh, Pasian in a hepina zieh a hutdam hi di leh a nasem dia ahing hat chiengin, a thu man a zuimai sang in Jonah bang a taisiet san a helsan gigate ihi uh ahi. Kipahna dan i thesiah uhi. Pasian thupieh zui sang in Jonah bang a mani ngaidan apei tum tinten a, "Bangzieh a Ninevi kho sese? Juda namte melma ahi ua, ahing kipahpi votsih ding uh! Bangma ka hi tuom sam a! kei sang in midang hizaw deu heh, ahi thei lieileh ka niel ahi mai!" chizelte ihi uhi. Khenkhat ngel bang mani gam leh nam i it zieh a Pasian in namdangte gawt ek-ek dia dei leh ngaitua ihi uhi.

I khel gige zieh ua thuohnate: Jesu'n "khovel vah nahi uh... Lei Chi (salt) na hi uh..." ahing nachi jouta hi. Miel lah a vah umsun a vakhie thei tuon sih leh a thuoh nasa mama di! Jonah thumanglou a taimang

a tembaw a nuomtah a a ihmud kal in, leitung mauna in adim a, buoi na mai in a buoi sih. Leitung abuoi mama leh, leitung mite bou dem a mosah a bailam mama. Hinanleh, tam hun ah Khristiante umkha ihi lepen, Jonah dinmun bang a "Keima zieh ahi amah?" chi a kingaitua a poimaw hi. Khristiante zieh ahileh, "Kei koi a ka hiei? bang ahiei ka dam san? Pasian in bang bawldia hing dei in ahing sawl?" I dawndan uh phuonkhiet lou theilou dinmun ah iding thouthou ding uhi.

Hattuom leh mimal haltha ahunta: Penticost ni in, Van apan mei bang a kilah in Hagau Siengthou suh halna ahing tung. Pasian Guolnei ihmu suhhal dingin vang, leitung mite lungkham leh mangbatna Pasian in azang hi. Guolnei Jonah halkhiet dan sil nuomloui ahi. Tuabang in Pasian hatna leh a thupieh zui nuomloute khu Pasian in a hal khiet theina di'n ngapi chi tuomtuom tampi anei a, taimangna ding himhim alampi aumsih hi. Tulai Khristian leh

"Jesu sisan ah siemtha zoulou mihing khu gotlou in aum sih ding uhi" - Philip Tribble.

hattuomte kaan a phunghal hamsa atamsih hi. Pasian in vang ahing phutlui ngaisih, hinanleh a lampi a peilou theilouna dinmun ah ahingpui ngeingei ding hi. Tam dinmun tan tan tun hun a mani hina pulah utloute vang a mangthai ding uhi. Leitung mangbang tah a kikou a ahing hatlai in hoi ah na um ei? Tulaikan a

Khantanhoi genna dia hun hoi leh Pasian thumang a Ama nasepna dia hun hoi igam ah aum kia ding amah?

Source: Dr RT. Kendall. "Jawlnei Jona leh Eite". Edited by Miss Dimzangai, Ruth Messenger, Vol-XI, January-February 2006, pp. 9 apat ka hing lekhiat sawn ahi: by Managing Editor. ●

MEIDIL SAT LEH HASAT DING DAN DAN AW!

Rev Muan Zou

Meidil sa mama ding a, genthei huoi mama ding hi. Mi hausapa Min, "... Pa Abraham Kei hing khotuo inlen, Lazar in akhutme dawn tui ah hing die henlen ka lei suvot dingin hing sawl in, tam meikuongah ka thuohgim sengta hi, achi hi", chin angen vangut a; ahinlah, ahi thei ding sil hilou hi. Neulai meidil thu kigen kana zakha khat leh YouTube a ka et khat; 1970s lai in, Soviet Union Scientist te in lei nuoi a tou ua, kum 20 jou in 12 Km (7.5 miles) a taw zou un, asat dan 1100°C leh 2000° F pha hi, microphone akhia ua, second 17 zou in jun manga, ka aw kija hi, kichi hi (Tuamun pen gawtmun hiva kichi a, ahin Bible get pen hilou hi).

Tulai sa mama a, genthei huoi ikisa a, Gawtmun leh Meidil, sat leh hasat ding dan, na ngaituo kha ei? Bible in, Gawtmun leh Meidil gen tahpi hi.

i) Gimthuohna mun, tui umlouna mun, meikhuong lah a thuohgimna mun, sanggamte tunna dia deilou na mun hi ding hi (Luke 16:19ff).

"Nusiet neilou hinkhuo khu kikhelna muding umlou hinkhuo ahi" - *Jacob Arminius*.

ii) Than shi louna leh meikuong ami louna mun (Mk. 9:42-50, Isai 66:24).

iii) Haltuina meili leh kaa leh hagawtna mun (Mt.13:49-50; Mt. 25:30).

iv) Kumtawn mei a gawtna mun (Jude 17; Mt. 24:46).

v) Mielna mun hi ding (Mt. 22:13).

vi) Khawldamna um louna mun (Rev. 14:11-12).

vii) Shi nina leh meidil (Rev. 20:14-15).

Gawtmun leh Meidil pen, gentheina leh gawtna zousie kumtawn a theichienna mun hi ding hi. Meidil ah Pasian

gawtna zousie kim dinga; Pasian thangpaina kumtawn in umden ding hi (Jn. 3:36).

Gawtmun leh Meidil um tah tah hi, Bible in gen hi. Gawtmun leh Meidil umlou anahileh Jesu Khrist Cross a ahing tatdoh poimolou ding hi. Pasian in A Tapa tangkhat neisun ahing piehna leh sawlna khu, gawtmun leh meidil itun lou na ding ahi.

Unau, Gawtmun leh Meidil zauna inei nai? Vangam ngaina leh tun nuomna inei nai? Gawtmun leh Meidil um tah tah hi chi na ngaituo kha ei? ●

PASIAN INNSUNG DONGTA

Bishop

Pasian in eite lah ah mit a muthei Inn anei hi. Tami Pasian inn khu ei leitung a um mit a muthei Hattuumte ihi uhi. Tami Pasian inn sung ah nasepna mun awng tamtah a um hi. Tami Pasian inn sunga nasepna khat pou pou sem dingte khu mi piangtha, mi ginum, michitah, mi nunnem, sumdu lou, neh le dawn, tep le muom a siengthou leh lungsim siengthou sum leh pai ngaina lou mi ahi ding uh ahi. (Gal. 5: 22-25; Tim 6:10)

Tambang ahiziehin, Pasian inn semte khu PASIAN INNSUNG sung a nasep poimaw tahtah DONGTA ahi mai uhi. Tami

“Jesu thawkiana khu melma Setan guollelna chiemtena hoitah ahi” - *Thomas Jefferson*.

Pasian Innsung Dongta a pang ut leh sem nuom miten, a inn neipa Pasian hatna aw (Calling) azah ngei ngei ding u'khu kul le poimaw pen ahi hi. Tuabanga Pasian in Ama innsung a nasepna poimaw tah nei ding a hatna aw, (calling) abawlte khu Pastorte ahi hi. Ken Pasian hatna aw ka za ngel ngel na hi chia PASIAN innsunga nasem dinga hing kipe khie leh kipan dohte khu PASTOR te ahi uhi. Kumpi nasepna ahiei, sum le pai suitheina, neh le tah suitheina lampi tuom tuom te taisan a, tami THU NASEP sem dinga adamsung a sildang lunggul nonlou dinga ahinna pekhie a PASIAN INNSUNGA nasem dinga hing kipe khete khu Pastorte ahi uhi. Bangteng hileh, hatna aw zakha zousie zong khu Pastor in apang kim thei tuom sam sih uhi. Tuachiin, i hattuum a Pastor a hing pang te khu PASIAN THU gen dinga guot ahitah ziehun, ama uhte khu THU NASEM ahi mai uhi. Tua ahiziehin, Pastorte khu THU NASEM zong akichi hi. "Tuachiin sawmleni ten nuazui mipite ahan khawm

ua, 'Pasian thugen tawpsan a, neh-le-tah ka sai uh adih sih ding hi. Tuaziehin unaute aw, na lah ua Hagau Siengthou leh pilna adim, mi min hoi ngen sagi tel unlen, amaute tam nna sem dinga ka guot theina dingun, achi uhi. Koute pen thum leh thu nasem in ka um zom den zaw ding uhi" achi uhi (Nasepte 6:2-4). Tambang ahiziehin, Pastor te khu THU NASEM dinga um aki hi mai hi.

Tuaban ah a inn neipa PA PASIAN in Ama innsung kem leh enkol dinga muongtah a ahing angansiate khu Pastorte mama ahi uhi. Tuachiengin, tami Pasian innsung khu kisuhtah leh feltah a, a asia-ahapha umlou a, hagau leh tahsa a Hattuum mipiten tan kikim a itan theina ding ua, Pasian zauna lientah toh vai hing hawmpieh ding leh TANUPI nasep hing seppieh ding mi aup ding khu kul le poimaw mama khat ahing suoh hi. Tami innsung ah, gim le tawl khohasalou a, sun le zan a, akul le poimaw dan zil a, gilkiel dangtah khosah lou a, nasem, halaw sang zong hilou

"Vuiliem neilou hinkhuo khu a hu, ga asuong thei sih hi" - Denis Hagraven.

a, Tanupi a hing pansah khu i Hattuum UPATE ahi uhi.

Tulai in, Pastorte leh Hattuum Upate Ordination lah dan/tandan kibang ahi chia gen mi khenkhat zong ilah uah aum uhi. Tami toh kisai in, Pasian Innsung a ina sepna uah, dinmun kibanglou leh nasep kibanglou ahi lel hi (Positional difference and functional difference ahi lel hi). Tam khu, itheikhel zieh ua igen uh ahi bou hi. Pastorte leh Hattuum Upate Ordination piehdan kibang lou ahi. Aziehpén, Hattuum Upaten Ordination alah chiengun, akep ding uh ama umna local Hattuum kem leh enkawl dinga khumi Hattuum min ngel ngel toh Ordination alah khawm jel uh ahi bou hi. Pastor te a khu khum bang ahi sih hi. Ministerial Services zousie khu Pastorte (Siempite) bawl ding ahia, akithuopi ding khu Upate ahi uhi. Tampen a Inn neipa Pasian in Ama deidan a, aguoltuoh ahi a, mihing bawltawm ahi sih hi.

Lamkai lui Mosi in sepna mun ni anei a, khumte khu SIAMPU hina leh ZAWLNEI hina ahi. Mosi in Siampu nna asepnah toh kizui in Thu Nasep asem hi. A kam a Pasian min lou in ahan a, akhut tegel adoptou a, azaahtou chiengin, Pasian in apanpi hi. A tahsa kum atam sim tahziehin, sawtveipi ading zou tasih a, akhut zong ahing kha ngetngut ta hi. Mosi khu Gim le tawl a ahing up tah chiengin, agei tuoh a um Aaron leh Hur in panpina ahing bawl uhi. Tami hun laitahin Aaron leh Hur in Upa nasep ahing sem ua, Mosi apan pi uhi. Mosi pen gim taseng in, ding zou non lou ahi chiengin, Aaron leh Hur in atouna ding suong khat ahing dawpieh uhi. A khuttegeldom jou nonlou ahi chiengin, alang khat tuoh ahing dop sah uhi. Tuachia Mosi in THU NASEP asepnah ah, Aaron leh Hur in Hattuum UPA NASEP dingte ahing sem ua, Joshua leh alawmte'n, TANUGUOL te nasep dingte ahing sep zieh un, khumi khu in Pasian akipahsah mama a, galzawna

“Thugen khu amasa dingte bawl masalou a eina dei dandan bawlthei ahisih, ban nei tah a bawl ding ahi” - *Garry Patrickson*.

loupitah ahing tang thei ta uhi. Anuoï a Laisiangthou Bung leh Tang khu hoitah nou in sim in.

“Tuachiin Mosi in akung a agen bangin Joshua in a bawla, Amalek ava douta hi. Tualeh Mosi Aaron leh Hur muolvum ah akaltou uhi. Tualeh hi ahing hi a, Mosi in akhut adop sang chiengin Israelin azou a, a khut a ngiem sah chiengin Amalek in a zou hi. Hinanleh Mosi khut ahing gih a tuachi’n suong ala ua, anuoï ah akoi ua, atungah a tousah uhi, tualeh Aaron leh Hur in akhut adoptou pieh ua, khat lam pang ah khat ale lampang ah khat; tuachi’n, nitum dongin akhutte pialou in a umta hi. Tuachi’n, Joshua in Amalek leh a mite namsau hiem in a zouta hi” (Pawtdohna 17:10-15). Tami khu tunia eiten i etton ding leh izui dinguh Laisiengthou tangthu ahi.

Inn dongta te kizepna ding (uniform). SHI SAH DING, KOIMANG DING, SIL DING.

Tami Pasian Inn sung a innsung dongta apang dingte khu’n, atahsa tungua aumsah vot lou ding uh, lungsim lunggel azong anei votlou ding uh leh amau mihinna a ashisah ding uh aum hi. Tamna, shisah ding kichite shisah lou a, amau tahsa a ahin teitei ule pen, khumipa or khuminu khu Pasian inndongtate lah ah melmapa Setan vanzah ahing suoh mai uhi. Hattuumte Hagaulam kalsangtointate ah asuhbuaitu leh a nangtu in apang zel ding uhi. Tambangte khun hattuum a it zieh ua agimna te uh leh asepkhiehte uh bou agen gen ding uhi.

SHISAH ding (put to death) ichite khu tamte ahi: “Tuaziehin na tahsa hieng uh leitunga umte sulum un, huasannate, sienthoulounate, ki etlanate, utna giloute leh huaihamnate, huaihamna khu milim bieha ahi” (Kolossa 3:5). Tam atunga i Laisiengthou in agenteng in ahuap khu tam anuoia te ahi:

“Tualeh alungsim ua Pasian

athei utlou ziehun Pasian in sil kilawmloute bawl dingin adeilou lam lungsim nei phal in ahazanta hi. Dihtatlouna zousie, hua a lanna zousie, gitlouna zousie, du amna zousie, kimudana zousie a dim in, thangsietnate, tuolthanate, kihaunate kisolnate, mi sietna ding ngaituonate in adim ua, nu leh pa thumangloute thudap gen hatte, Pasian mudate, misimmaw hatte, kiliensahte, kithuneisahte, silgilou pandoh mite, nu leh pa thumangloute; Theisiamna neiloute, muonhuoina beite, itna beite, ngaidamna neilou leh hepina neiloute ahi uhi: Tambang sil bawlte shitah mawng ahi u chi leh Pasian thukhenna dih ahi chi theinapi in ama uh bawl guoh zong hilouin midang tambang bawlte zong akipahpi uhi” (Rom 1:28-32). “...angkawmna, kingaina, thanghuaina, sienthounlouna, numei pasal kaal a pahtatna, milimbiehna, bumna, kimudana, kihauna, thangsietna, lungthahna, kilangbawlina, huaihamna, kiselna, gintuomna; deigawna,

tuolthana, zukhamna, uaongtatna leh tambang gamtatna dangdangte ahi, tambang a um miten Psian gam aluo sih ding uhi” (Galatia 5:19-21).

KOI MANG UN (Put off) Kolosa 3: 8. Hinanleh tuin vang tam silte zousie, lungthahna, thangpaina, aselam a kideisahna, kigensitetna, ham giloute na kam ua pat koimang un.

SIL UN (clothe yourself). Kolosa 3: 12. Tuaziehin Pasian mitel, misiengthou leh deitahte, bangin lainatna, nunnemna, kingaingiemna, lungnemna leh thuohhatnate sil un.

Tuachiin, i suhlup ding, itha lup dingte lah thatlum lou, ikoimang dingte lah koimang lou leh i sil dingte lah sil utlou pum pum a, eima mimal agenda puohlutna ding leh Pasian Leenggam sanga eima mimal leenggam kehlet utna zieh a, A siengthou PASIAN INNSUNGA nasepna nei a Ordination tang ihi khah leh azau huoi mama ding hi. ●

“Pasian gam tunna ding in I lungsim kot hawn apoimaw hi” - *Martin Tupper.*

MIHING MANPHAT DAN

Retd. Rev Dr Hangminthang

Tangtel: “Mi khat in leitung pumpi nei henlen, ahinna taan taleh ama adingin bang aphaltuom diei? Ahisihleh min ahinna taangin bang ahiei apieh ding” (Mathiu 16: 26).

Tami toh kisai in Thugentute’n agen dan un, leitung pumpi sang a mihing khat hinna thupizaw leh mantamzaw ahidan in agen uhi. Pasion in mihingte ahing it a, tatna ahing bawlsah zieh khu, Hinna Ama hing pieh ahia, khum hinna mihingte sunga um khu Gawtmun a alut ding a phallou zieh ahi.

Eite’n, Pasion in ahing pieh ihinna uh zieh a Pasion mitmu leh ngaia manpha (mantam) ihidan ikitheilou zieh un, thanguhoi tahin ikimang uh. I theisiemlou ziehun, eima a ikisa ua, Pasion a ihilam ikithei sih uhi.

Tuazieh in, simlei vai leh hattuom vai nasan ah, ikizua uhi. Kizua ichi leh numei maimai kizua thei dan in i ngaituo ua, amabou-pasal zong ikizua uhi. Bangchi dan a kizua ihi uoi?

1. Simlei vai (Political election) kiteelna ah ikizua uhi. I Vote neisun uh manpha tah, tawm nou nou in ikizua uhi.
 - a) I man uh- ikizua man uh Rs 500/- pou, Rs 1000/- pou ahi. Ui (dog) pumkhat sanga zong mantawm zaw ihi uhi. A hing siemtu Pasion in bangchin angai diei?
 - b) Hattuom sung kiteelna (Church Election) ah zong ikizua uhi. Khawmpi hawna ding Bahara pou in ikizua uhi. Ui (dog) pumkhat khu Rs 3000/- apat Rs 7000/- tunglam ahi. Mi khat in uital chin hing hou lelah za da mama ding haia maw! Hinanleh Ui khat sang a mantawm zaw a i kizua zel ukhu pamai kisata vai in, integrity nei in hinga vai.
 - c) Hattuom sunga kiteelna a kizuate vangvang Jesu Khrist zal a dihtatna neite adin, tambanga hinkhuo manlou ding ahi. Khawmpi manna ding bahara neiloua, na kizua saangin, khawmpi manglou in umzaw in- tami khu INTEGRITY ahi. ●

“Melma totchil ding ah iki imna daite phelkhiet pia a iumlouna dia pilvan apoimaw hi” - *Simon Petros.*

MISSION COLUMN

BARTHOLOMAEUS ZIEGENBALG

“India gam mite Missionary Pa”.

Rev Dr M. Thangboi Zou

BARTHOLOMAEUS HINKHUO MASA: Ziegenbalg khu Germany gam a Polsnitz, Saxony kichi khuo khat ah 10th June, 1682 in ana pieng hi. Apa ahileh Buhum akipat sumsui a mihausa khat ahing suoh hi. Anu-le-pate tahsa damtheilou ahijieh in, Ziegenbalg zong apumpi hatlou in zawngkhal nanleh alungsim leh ngaisutna pen athupi mama hi. Anu ahileh Pasian theimi ahia, ashi masangin, atate kung ah, “Tate aw, Laisiengthou sung sui un, tuana Gou manpha/ thupi aum diing hi, alaipeh chingteng a ka hitui in kanulsieng tahi” achi hi. Ziegenbalg in anu thugen ahinkhuo ah manghil thei sih hi. Anus hi kum 2 zoh in apa’n ashi san kia hi. Tualeh a kumkia in asanggam numei inun ashi san kia hi.

APIENTHA NA: Ziegenbalg in Polsnitz a Latin Skul ahingkai zou in, Gearlitz ah 1694 in kum 12 achingtoh kituo in High Skul ahingkai hi. Kum 5 sung in mutheilou sunglam a kipan hingpiengkhe Sakhuo ah ahing lunglut tahi. Ahinkhuo a vangsietna tampi thuo zong leh anu thugen manghil lou in aman zong Laisiengthou zildin 9th July, 1706 in University of Halle alut din akuonta hi.

Tuana a sangsiepa ahileh August Hermann Francke ahia. Tuamun khu Lutheran thugin kizilna mun ahi. Tam mun a Philip Spener, leh Aogast Praickete laigelte’n ahinkhuo thuzaw mama hi. Halle a aum sungin adamthei sia, hinanleh tahsa hatlouna kipan Mangpa’n adawmsang ahidan akithei a, akipah mama hi. Nisim in Laisiengthou a sim a, Hebrew haam bang asiem

“Silhoi bawl dinga Jesu Khrist a siemtha ihina uh imanghil khazel uhi” - R.W. Emerson.

mama hi. Pasion zatat leh mite pomthei ahina diing in ahinkhuo a kingiemkhiet tah in thumna anei zing hi. Atahsa hatlouna leh damtheilounaten ahinkhuo a kingiemkietna thupitah anei sah hi.

MISSIONARY DIA HATNA:

Laisiengthou a jilsung in Pastor dia chielna tampi amu a, nanleh amapen Missionary nasep a mundang a hagau mangthai mat ding alunggul zaw hi. Tuahun laiin Denmark gam Fraderick IV in East India Companyte lah a Denmark mi umsunte lah a Missionary sawllut diing alunggul mama hi. Denmark kumpin agammite thakhel a Ziegenbalg chiel in a um a, tuana kipan missionary din thutanna bawl tahi. Missionary akuankhe din ama leh Heinrich Pluetschan amun uh Denmark gam Copenhagen mun a pielut in aumta uhi. Denmark kumpi thupie dungzui in tam laisiengthou sin mi 2te Lutheran Hattuum a Bishop din anamkip sah tahi. Tuachin ama leh alawmpa Heinrich Pluetschan India gam Missionary din akisa kheta uhi.

Tam tangval 2te khu 9th July, 1706 in India gam Tranqueber mun ahingtung uhi. Tam mun khu Danish mite thuneina/ vawihawmna ahia, tuamun a Danish mite leh Pastorten ana kipahpi vawtsih uhi. Khopi sunglut ding akiphal sia, bazar lah ah ading koikoi uhi. Vaihawm mi koiman ngaisah in anei sih ua, sil zousie amau tegel nieltu abang hi. Mipiten lah Denmark kumpipan enkhetu dia ahingsawl chin agel uhi. Amau gel khu India a Protestant Missionary masapen ahi ua, hamsatna leh gentheina tampi athuo uhi. India mite pen, Europe mite leh Portugues mite suoh-le-sal ana hi uhi. Tamna amauten Mission Skul ahong ua, tualeh taga kepna zong ahingpan uhi. Ziegenbalg tup-le-ngim pen ahileh tunung a India mite Khristian suosah ding chi ahi hi. Kum 12th May, 1707 in Portugues mi India haam a ham mi 5te Khristian in ahingkipia ua, baptisma zong atangngal uhi. Gingtu hingum ahitah manin Biehinn lampieh diing ahingkulta

“Nisim a Jesu Khrist hepina atha dungzui in midangte hepina ah ka luonglet hi” - *Simon Jefferson*.

hi. Ajiephen India Khristian ten Europe mite biehinn ah avakai nuom sih ua, biehinn tuom nei diing in ahingkisa uhi. Hinanleh Governor in biehinn tuam a kikhen ding deilou in mun-le-muol ape nuom tasih hi. Biehinn lam diing phal hisih nanleh atawp tawp in ahing lam panta ua, tuana Missionary lamkaiten ahalaw kimkhat biehinn lamna din apie ua, khristian ten zong akithuopi uhi. Tuachin 14th August, 1707 in Biehinn Hawнна Ahingnei theita uhi. India mi tampi zong Khristian in ahingkipie ua, ahing tamdeudeu ziehun kum 1717 in Biehinn tha ahinglam kia ua, tam biehinn tha in kum zabi tampi adai hi. Tua biehinn tha khu tuni tanin Lutheran Congregationten biehinn in azang nalai uhi.

Tamil Madras leh Cuddalore vel a Pasian thugen in azin koikoi a, Tamil Khristiante adia gouthupi tah hi diing in Tamil haam in Laisiengthou ana letkhie hi. Kum 1713 in Thuhun Tha agelpen akisuonkhie a, tualeh Thuhun

Lui zong Ruth tan ahinglet a, aban pen mi dangten asunzawm hi. Kum 1796 in Tamil Haam in Laisiengthou bu pumpi aletkhie a, India gam sunga haam tuomtuom akigel laisiengthou Tamil haam aletkhe masapen ahi hi. Tuaban a Tamil haam in Grammar bu abawlkhie hi. Halle mun a alaisim laiin Grammer asiemna khu tun 1715 in Tamil mite adia hamphatna din Grammer bu ahingbawl khietpen tunua chienga Missionaryte adia panpitu hoitah ahing suoh hi.

BARTHOLOMAEUS IN BIBLE SKUL AHONNA: Kum 1716 in India mite maban diing akhuolnan Tanqubar mun a mi 8 kaitheina diing in Bible Skul aphut khie hi. Tam Bible Skul khu tunin Protestant te adia Pasian thu sinna mun poimawtah ahingsuota hi. Thamlouin tamna Skul apan in Pasian nnasem diing Pastor tampi zong asiemkhie hi. Kum 1733 bullam in Hindu mi Aaron kichipa khu India gam a Tamil Lutheran Church

“Galvan lah a amuonhuoi pen khu Pasian galvan khu ahi” - *Brian O Neil.*

a Pastor dia namkip (orden) masapen ahi hi. Ziegenbalg in India mite Pasian nnasem din khat asinkhesah hi. India mite mabandiing khuolnan adiehin Khanglaite adin Sanginn ahawng hi. Khanglaite a inn ua kipan hankhie in boarding ah akoi a, neh-le-tah leh sil-le-ten bangkim apie hi. Tuachin kum 1713 in Halle akipan in Laisutna khawl (Machine) khat alei a, tuami zangin Pasian nna theitop suoh in ahingsem hi. Phatna late khu Tamil Haam in aletkhie a, thamlou in Thumna bute leh kipumpiehna laibute zong aletkhie a, tuate khu mite kungah athawnin ahawm jel hi. Theitawp suo in Pasian nnasem in Madras leh Ceylon (Sri Lanka) vel leh mun tuomtuom ah Pasian thugen in azin koikoi hi.

ZIEGENBALG THONGINN ATANNA: Denmark mite tenna a Governor Hassius in Missionaryte subuoi jel hi. Kum November 1780 in Ziegenbalg a Huong sung (palace/ compound) a koidin ahan hi. Tuachin aman diing

in galkapte Thau (Gun) kamsa tawi in Mission inn ah avalut uhi. Tualaitah in Ziegenbalg khu Khupdin a thumna nei in ana um a, tuachin naikal tampi inn mai ah a ngah uhi. Galkap lamkaipa lungthah gawp in a thumna neilai tawpsah in anuahzui din ahan khie hi. Governor Hassius masang a Ziegenbalg khu Mangpa Jesu Khrist bangin sipdide in adiing hi. Tuachin Governorpan Thonginn a khumdin thutanna asiempi tahi. A umna Thonginn sung ahileh Meisa gei leh Nisa ten asal a sa asah nadin chin akikoi hi. Alawmhoipa Pluetschan in avave diing zong akham uhi. Thong tanna ahamsat seng jiehin adamtheina asuhkha ta a, atha bang achaugawp mama tahi. Hinanleh Paul leh Sailate bangin Thonginn sunga Pasian phatna lasa in ahunte azang hi. Hassius inzong deibangin thonginn ah akhum theisih hi, Ajiehpen annasep hoinaten mipite zouin Itna leh hepihnate jiehin mipiten

“Apuo ngailou hilou in, ipuo chia thawkiana khu a thupi hi” - R. W. Emerson.

a thonginn tanna toh kisai Governorpa khu aheh ua, tuachin ha li (after 4 months) zouin ahingpawt kheta hi. A thonginn tan zou akipan in alunggel ahingkhel a, hamtmlou in aum tahi.

A ZI NEINA: Ziegenbalg in India gam a Mangpa gam nna kum sawm asej jou nuain kum 1715 in Furlough (sudy) in Europe gam ah ahingki nualeh hi. Tuachin Denmark kumpipa toh mailam a Pasian gam nasep diing dante ava kikup pihi. Tuachin India gam a Pasian nnasepna din sum-le-pai tampi panpihna (donation) amu hi. Halle avahaw laiin, nungah melhoitah leh maitai mama khat Dorothea toh ava kimu khah uhi. Akimu tung ua kipan akingaipai ngal ua, tuachin thutanna siem tuoh in Kum December, 1715 in a kiteengta uhi. Akiteen joughet in India gam a Pasian nnasem din Holland leh England gamte tuonin ahingpei ua, August, 1716 in Madras ahing tung ua, mipiten ana kipahpi

mama uhi. Madras numeiten alungkhamna uleh abuoinate uh Maria Dorothea kungah ahingtut zel ua, tuachin Missionary innkuon dangte toh kituohtah in nna hoi ahingsem panta uhi.

Mission Board, Copenhagen mun a aumlai a Christian Wendt Secretary pa nuoi ah, tambang in soiselna atuoh hi. Tuata ahileh:

- i) Missioanry zousie nidang a sawltah te bangin Sum-le-pai louin thugen in munkhat a kipan mundang ah avakuol diing hi.
- ii) Piengtha leh gingtu umtha ten amau leh amau kitoudel in hattuum phut in Biehinna alam diing uhi.
- iii) Missionaryte hiel nasepnate ah kihallou in thugenin avahzel diing hi. Tambang thuten Missionaryte leh Secretaryte kikal ah buoina lienpi atun law hi.

A HINKHUO TAWPLAM: Ziegenbalg ahinkhuo a buoina leh hamsatna atuoh

“Pasian kipahsahtu ihi theina ding in, bangkim tung a kipah thei gingtu nahi ding ahi” - *Simon Jeffrey*.

diing mawng hileh akilawm tamai hi. Tua banga buoina leh hamsatna ahinkhuo a atuovangin Ziegenbalg in lungkietna anei vawt sih hi. Ziegenbalg in Pasian nna asepdan ahileh Missionary nasep a hattuum phukhiet diing chileh Sanginn lam diing chite apeikhawm sah hi. Tuachin miten Pasian thu amau haam chiet ua asin diing uh tupna anei a, tuachin laisiengthou lekhetna (translation) lam apibawl mama hi. Kum 1713 in Thuhun Tha laibu Tamil haam in aletkhie a, tualeh Thuhun Lui akimkhat tan zong ashi masangin aletkhie man hi. Pasian thu agen chiengin mite lungsim leh ngaituona thei masa in Pasian thu agenziel hi. Ziegenbalg ahileh asepnua ua Secretary pu Christian Wendt in abawl genthei mama hi. Zeigenbalg muong joulou chin panpina sum-le-paite zong a thawt non sia, tuamin Ziegenbalg Pasian gam nasepna a tangpi asubuoikha mama hi. Ahinkhuo tawplam a a secretarypa

uh bawlsietna thuojoulou in atha ahingchau gawpta a, tuachin adamlounate leh Secreatarypa toh akalthu buoina suveng diingin Europe gam ah ahingpei ut tamai hi. Nanleh adamtheina hingba senggawp in, Europe gam sangin Pasian in aguotpieh gam lam zuondin adamtheina lam akiem hiei hiei tamai hi. Tuachin Pasian in ahinna apiepen, apan 23rd February, 1719 in a it mama India gama a Madras mite nuasie din alatou tahi. Ashi diing kuon in Tamil Khristiante alupna kiim vel ah hankhawm in, Pasian adia gin-um diing leh kukaldin ahasawt hi. Ziegenbalg in a khut amite tunga koiin, “Ka mai ah Nisa bangmai a vah ahing tang hi” achi hi. Tuachin Mang Jesu Ka bitna chi la sadin angen a, tuachin mipiten Piono tum kawm in asa ua, tua la asah sungun Ziegenbalg in thupina gamlam azuonta hi. Ashi in atahsa kum 37 a upa lel ahi hi. ●

“Pasian hun gamlatsahtu ding bumna nasep khovel in mithei in a tung zing hi” - *Peter Carrick*.

*A Brief Report on***CONFESSIONAL LUTHERAN
PASTORS' CONFERENCE****Report petu: Bishop MELC**

Sri Lanka tuilaisie gam a Lutheran Church-Missouri Synod te'n America gam apatsa Missionary a ahing sawl uh Rev. Roger James of America leh LCMS Mission Co-ordinator for India Rev. Ravi C. Jesupatham of Nagercoil, South India te'n 2014 January ha lai in ihattuom vena ahing nei uhi. Khumi hunlaitah a I hattuom a Bishop khu Rev. Ginkhanmung Zou ahi hi. Tam mi 2 te'n ahing ve laitah un, Bishop Rev. Ginkhanmung Zou leh Rev. S.K Manlun khu LCMS te saina nuai a, Lutheran Symposium (Khawmpu) 2014 mang a, Fort Wayne khopi America a aup laitah uh ahi hi. Tuachiin, Bishop Mungnou zong, St. Louis khopi a um LCMS Head Office mun a, LCMS President Rev. Dr Matthew C. Harrison toh face to face a ahing kimupi ding chithu leh laihah leh present ding jong kipawsah hi. Tuabanah, Rev. James leh Rev. Ravi deisahna zalin, Rev. Hangminthang leh Rev. Khup Do Khen ten jong,

“Setan gal douna hoi dou ding in kipan vai” - *Paul Adrian.*

2016 kum January ha in, Fort Wayne, Indiana, America ah Lutheran Symposium khawmpi ava mang uhi.

Tam zin melpha 2 ineite uh khu, Sielmat EFCI-te Guest house ah akitungsah a, amau tegel kithuopi leh mapui dingin, MELC Office lam apatsa in Development Secretary Pa Khup Do khen guot ahi. Bangthu leh bangla tawh kisai a visit na hing bawl uh ahei chia akidoh chiengin, India gam North-East Manipur State ah Lutheran hattuum um hi chi Internet apatsan MELC Website ka na mukha ua, bang dinmun a um, bang doctrine zui leh Theological belief bang-to-bang nei leh zui, leh bang chibang mi le sa ahi mong mong uai ma chia hing munuam a hing kuan mong mong hi ung chiin ahing dawng uhi.

Khumi hun lai akipatsan, ama uhte tawh kimeltheina ana umden ahiziehin, Phone,Whatsapp leh Fb, te tungtawn a kithuzahna khu khawllou a sutzop tou ana hizing hi. Tuachiin,

workshop, Seminar, Training, Conference leh adang dang, ama uh conductna nuaia kibawl te a, MELC te zong apan theina dingua ngetna akibawl ziehin ahing phalsah ua, tuachiin I Pastor deitah uh 16 ten Conference ava mang thei uhi. Siengthou tahin gentalei, LCMS te khu tu-le-tu a ikizawppi uh ELCA te toh biehn peidan kibang votloute ahi uhi.

Conference Details.

Dates: May 19-22, 2026 (Tuesday – Friday).

Location: Bangalore, India, UNITED THEOLOGICAL COLLEGE (UTC), Millers Road.

Theme: Confessional Lutheran Preaching and Teaching in the Indian Context.

Conference Purpose: Build a united confessional Lutheran Commitment in Churches across India.

Topics addressed include:

“Na kipahna khu Mangpa dan ahilou leh, khovel dan a kipah nahi mai hi” - *St. Patrick.*

- | | |
|---|---|
| <ol style="list-style-type: none"> 1. The Word of God: Confessional Understanding of Scripture. 2. The Small Catechism: Content, Catechesis and Churchly Use. 3. The Book of Concord: Nature of Confessing and Church Fellowship. 4. Contemporary Issues: Women's Ordination, World Religions, Lutheran World Federation. 5. Preaching: Proclaiming the Redemptive Words and Deeds of the Lord Jesus Christ. | <ol style="list-style-type: none"> Thanlon 7) Rev Kapkhanhau, DS/ Moreh 8) Rev Khamkhenthang, Biel Pastor 9) Rev Ngilzakhup, Biel Pastor 10) Rev T. Chinlunmang, Biel Pastor 11) Rev Thangkhongam, L/ Pastor 12) Rev Dr M. Thangboi Zou, L/Pastor 13) Rev T. Doucinlal, L/Pastor 14) Rev M. Hausawmlal, L/ Pastor 15) Pro Pastor Langzungthang 16) Pro Pastor Mangliansang |
|---|---|

List of Conference Participants

- 1) The Rt Rev Khup Do Khen, Bishop
- 2) Rev Kamminthang, Dir. of Mission
- 3) Rev Dr Ginkhanmung Zou, DS/ Singnat
- 4) Rev Dr S.K Manlun, DS/ LWD
- 5) Rev Ph. Nangkhanlal, DS/ Sangaikot
- 6) Rev Kapsuankhup, DS/

Buoina tuom tuom zieha hing pangtheiloute:

- 1). Rev. Suonboi Tungdim
- 2) Rev. Nengkhanlal
- 3). Rev. Kamminthang Tungnung
- 4) Pro-Pastor Mangsuankhai
- 5). Pastor Johnlal.

Tami conference pen Pastors Exposure Tour jong chithei in a um hi. Vanleng a tuong khanailou teng in Vanleng ka

“Na umna khu koi Lalgam ahiei, chi theichien in” - *Dennis Rowling*.

tuonlaw ua, Meileng a tuong khanailou tengin, Meilengah ka tuan law uhi. Tuaban ah, Calcutta apatsa Lengpui Vanlengphuol zot ding ni in, Mizoram ah guoh a chiin zieh leh meilum asah seng ziehin, flight cancelled ahing hi gui mawh hi. Tuachiin, Mizoram zuan a lengding Passenger zousia khu, Calcutta Vanlengphual nai a um FOUR STAR HOTEL noptah khat a nitah ann nehna, giehna leh Breakfast nehna nei dingin, Car in ahing ban puoh ta uhi. Tuachiin, ka ann nehna mun uh Dining Hall ah, An chituom tuom, me chituom tuom, nehthei chituom tuom, Juice chituom tuom, atui thei pen pen te, chitam mama, lamdang sahthei khop hiel a tam, atui lou um lou, khumte khu, kouloi honkhat a va nekha ka himai uhi. Mihausate tunna leh giehna a va tung kha leh mihausate ann nehte va nekha ka hi mai uhi. Ka flight uh ahing ki cancelled khahlaizang pen, kou honkhat a dinga, *"Blessing in disguise"* achite uh ahi mai hi.

May 22, Friday, khu ka Conference uh Kikhenni ahi hi. Tami Ni mama in, Rev. Dr. S.K. Manlun lamkaina nuoi ah, Pastor 8 in Direct Guwahaty a zuan ua, Rev. Dr. Ginkhanmung Zou lamkai na nuai ah Pastor 8 mama khu Bengaluru ah ka umden ta uhi. Tam khu MELC Guwahati a Chairman Upa Khamzalam leh Azi Upanu Manpi banah local Pastor Rev. Dr. M. Thangboi Zou in, ama uh local hattuum vena nei dinga chielna ahing bawl zieh ua, extended program dan a bawl ahi. Tuachiin, May 22, 2026 ni in, Hattuum kiphut tha lileh vave ding a, Guwahati lam a pei pawl leh Bengaluru a um den pawl ka hing kikhenni ta uhi. Conference kikhenni Friday nitah in, Bengaluru a umden Pastor 8 te khu, Bengaluru ELWA ten ahing kikhawp pi ua, MELC Bishop in Pasion Thutah gen na hun zang hi. Pasianni sun Bieh inn kikhawpna ah, Rev.Dr. Ginkhanmung Zou in Pasion Thutah genna hun zang hi. Tami Pasianni khu Pentecost

"A thawn a silpieh imu/ itante khu a manbei a piadoh kia ding ahi" - Anthony Clarke.

Day ahitoh kizuiin, Rev. Dr Mungnou in, sermon ngainop huaiah a bawl hi.

Tuama bangin, Guwahati lam a peiten zong Bieh piehna hun jang nuam mama uh hi chi thu kiza hi. Pentecost Day lopna leh ama uh vave a haw Pastor 8 te vaidawnna in Annkuong sawhkhawmna thanop huaiah zong nei uh hi chi thu kiza hi. Tutunga Pastor 16 in tambang program ava kizah thei khah pen, Pasian hepina ahi ichi lou thei sih uhi. A va pangkha Pastor teng in zong nuam kasa chiet ua, Guwahati leh Bengaluru pen Bazaar kaina a vazang zong ka hi mai ua, van lom lianpipi toh innlam ka hing zuan chiet lii-liei thei uhi. Guwahati lam a peiten, May 24, 2026 (Pasianni) zanlam nai 7.00 vel in Guwahati nuasia in Meileng ah ahing tuang ua, a zing Seppatni 25, zinmawng lahvel in Sairang, Mizoram atung uhi. (Fun time...Ham toh nui toh thuo in... Au... Au.... Aa..Aa..aa ka va sah banuah, Vanleng sunga sem Nungah (Cabin Crew) te

zong, kamu patna uh ahizieh adieimah, mel hoi ka sa thei mama ua, lim zong ka hing kilah pi uhi...a ki Hope chu hilou aw).

Tutung CONFESSIOAL
LUTHERAN PASTORS'
CONFERENCE, ei hattuum
Pastor ten iva zahkhah
theina zieh khu, Pasian
deisahna itanna uh ahi
ban ah, America a um St.
Louis khopi Headquarters a
zang, LUTHERAN CHURCH
MISSOURI-SYNOD ten,
Indian Country Co-ordinator
a ana pangzing Rev. Ravi
C. Jesupatham in ahingna
deisahna zieh ahi hi. MELC
Bishop in, tam Conference
a MELC Pastorte zong apan
theina dinga ngetna abawllai
in, Rev. Ravi in ahing na
phalsah a, itan loudi pi
tangkha isuoh ua, Pasian min
phat in umta hen. I chi adam
a, ivang uh aphot leh kumkia
chienga zong va zah kia thei
ding uh ahi hi. Ahun ding May
11-14, 2027, Amun ding, UTC
Bangaluru mama. I thunget
na uah thei chiet vai. ●

“Khovel dan a kalsuonna khu Pasian thu toh kikal a kalsuonna ahi” - Anthony Norris G.

MELC INNSUNG THU

1. BISHOP IN LUTHERAN THEOLOGICAL INSTITUTE HONNA NEI:



MELC in kum tampi plan a ana kinei leh MELC khangthu adia chiemte thamching, Lutheran Theological Training Institute (LTTI) inn mun pansan a Laisiengthou gal zilna (correspondence), khu 3rd June (Wednesday) 2026, Nai 11:00 AM in Hqrt Church, Zomi Colony MELC biehin ah Mangpa Pasion ma puina toh LTTI, 1st Batch, **student mi 116** toh The Rt Rev Khup Do Khen, Bishop in Pasion thutah tomkim a agen jou in LTTI honna leh alatna anei hi. Akihonkaw akipat tunitan a LTTI Admission agawm in Mi 126 apha tahi.

Tam Vaiguon ah Rev Kamminthang, Secretary LTTI in Conduct hina la in, Rev Thangliankham in Kipat thumna nei hi. Upa S. Zamzalam, Moderator- cum- Ex officio LTTI in Vaidon thugenna leh Vaiguon pei ding dan genna ahun jou in, Rev Dr M Thangboi Zou, Member LTTI in LTTI maban pei ding dan genna/ pulahna hun ala zou in, mipite akipat mi-3 vel in tomkim a thugenna aneizaw in Rev Suanboi Tungdim, member LTTI in Topna leh Singpi latna nei in, lawchingtah in Vaiguon zaw ahi tahi.

2. Tangkou, Petron Member kibelap zel:

MELC, Guwahati zong Petron Member a ahing pang na tung uah, Editorial boardten lungdamthu akigen hi. ●

“Kichilsiettuana khu Setan lungput eima a muthei a hing ga doh khu ahi” - *John Gibson P.*

If undelivered, please return to
The Editor, Gospel Tangkou
MELC Head Office, Zomi Colony
Post Box – 10, Churachandpur 795128
Manipur, India,
e-mail: melcqrts@mail.com

Gospel Tangkou (Gospel Herald)
RNI Regd. No : 62170/95 MNP 76
(Hachin a kisuo, hattuom khanletna ding)

Printed at



Convention Book House
Dorcas Hall Campus, New Lamka

BOOK POST

To

.....

.....

.....